



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fa-tschendas:

Disco Sounds: ingüna gestiun regulara, be permiss per singuls arrandschamaints

Davo cha la disco “Sounds” sün Trü es gnüda serrada la fin d'avrigl da quist on ha il cumün tscherchè via inserat ün nouv fittadin pel dancing Trü. Pür ün lung temp davo chi d'eira scadü il termin han trais interessents inoltrà annunz-chas e concepts per üna reavertüra da la disco sün Trü.

In sia sezzüda dals 11 october ha il cussagl cumünal evaluà ils trais concepts. Davo cha ningün nu til ha persvas ha el decis perquai da desister sün üna reavertüra permanenta o regulara da la discoteca o dal dancing Trü. Plüs puncts han giovà lapro üna rolla:

A Scuol exista darcheu üna discoteca in possess privat. Quella cuerna il bsögn da basa da la giuventüna indigena. Il man public nu voul concurrenzar gestiuns privatas cun üna sporta in ün stabilimaint public. Plünavant nun es il lö per üna discoteca immez ün quartier abità adattà, anzi el es e resta fich problematic cun bleras abitaziuns da vacanzas ed eir cun ün hotel in vicinanza. I nu füss da preverer cha la canera e'l vandalissem evidaint as diminuissan i'l contuorn da l'implant da Trü. Quai eir pervi cha pella pulizia chantunala nun esa pussibel da garantir üna preschentscha permanenta d'ürant tuot l'on mincha not da venderdi sün sonda e da sonda sün dumengia i'ls cuntuorns da Trü.

Pro quistas ponderaziuns ha il cussagl cumünal eir as referi a la decisiun dals 28 mai 2008 da lair serrar a mez lunga vista la disco sün Trü. I füss stat uossa fos da far novas spranzas ad ün potenzial fittadin e manader da la disco sainza til pudair dar la perspectiva a lunga vista.

Il cussagl cumünal arcugnuoscha il bsögn da la giuventüna dad avoir pussibilitats da trategnimaint. Exponents dal cumün sun perquai eir pronts da spordscher man per intermediar e sustgnair scha privats vöglian metter in pè üna eventuala nouva discoteca in ün lö ingio chi dà damain problems.

Quai chi concerna il local da l'anteriur "Sounds" es il cussagl cumünal perinlet da til metter a disposiziun pel prossem temp per singuls arrandschamaints, sajan quai lura concerts, singulas sairadas cun disco o eir oters arrandschamaints. La quantità dals permiss per arrandschamaints chi laschan presümer canera e disturbis i'l cuntorn es però limitada. Implü less il cussagl pussibilitar in quist local eir arrandschamaints per uffants e giuvenils, eir per da quels suot 16 ons, tenor il concept da la lavur da giuventüna regionala chi'd es actualmaing in elavuraziun.

Avegnir da l'hotel Scuol Palace

Potenzials interessents lessan realisar aint il stabilimaint dal Scuol Palace eir abitaziuns, sco chi'd es pussibel illa zonas d'hotel (abitaziuns sün 40% da la surfatscha). La ledscha da fabrica actuala nun admetta quai oura Nairs. Il cussagl cumünal es da l'avis chi füess da spordscher man (cun üna revisiun parziala da la planisaziun) per cha'l Scuol Palace haja insomma ün avegnir, almain parzialmaing sco hotel.

Plan da quartier Clozza

Il cussagl cumünal vaiva publichà l'intenziun d'introdüer la planisaziun da quartier per Clozza e refüsà ils duos recuors chi sun entrats in seguit. Uossa ha'l decis fuormalmaing l'introducziun dal proceder pel plan da quartier. El sustegna eir la proposta davart dals iniziants pel PQ da laschar elavurar il PQ sün basa privata da l'architect Men Duri Arquint (part planisaziun) e l'advocat Armon Vital (part giuridica).

Funtana Rablönch

Il cumün cumpra in Rablönch 600 m² da la parcella ingio chi's rechatta la funtana. Quai per pudair inchaschar definitivmaing l'aua minerala e s-chaffir üna zona da protecziun intuorn l'inchaschamaint. Ün paur ha interess da cumprar il rest da la parcella, ad el dess gnir pussibilità ün access nan da l'ost.

Cuttüraplana

Il cussagl cumünal giavüscha fingià plü lönch cha l'attach da la Via da Tarasp a la Via d'Engiadina vegna fabrichà oura. Quai impustüt siond cha quista via serva sco access pella zona da mansteranza in Buorna. Sco prüm dess gnir fabrichà oura l'access da suringì, v.d. nan da la Staziun VR. Per l'intera via da Tarasp, cumprais l'attach in Cuttüraplana, vain elavurà intant ün proget. Il cussagl decida da metter l'import necessari aint il preventiv 2011.

Via da Bain Crotsch

La via vain dovrada bler, tanter oter dals chavagls da San Jon, e sto perquai gnir reconstruida / rinforzada cun fabrichar aint üna spezcha da betun. Ils cuosts importan ca. CHF 36'000.--, il cumün po far quint cun 65 % subvenziuns.

Localitats da scoula

Il cussagl da scoula ha rendü attent al bsögn d'ulteriurs locals, il plü tard per l'on da scoula 2012/13. Il cussagl cumünal es da l'avis chi saja da far ün concept per l'utilisaziun da l'inter areal da Quadras, d'integrar dimena eir la Chasa Central, la Chasa du Parc, la chasa cumünala e'ls areals intuorn. Plünavant sun da tour suot ögl in quist connex eir il stadi energetic dals stabiliments e la situaziun dal trafic (parkegis).

Il cussagl cumünal decida d'installar üna gruppa da lavur cun rapreschantants da la magistraglia, dal cussagl da scoula, dal cumün (uffizi da fabrica, cussagl cumünal) e da l'inspectorat da scoula. Quista cumischiun collavurescha lura cun ün planisader extern.

Ün local existent in chasa da scoula dess gnir drizzà aint sco officina per lavuors da fier battü. Il cussagl cumünal decida da metter ün import aint il preventiv 2011 per quist scopo.

Surdattas da lavuors

Chanalizaziun e provedimaint d'aua in Porta:

lavuors d'impressari: Bezzola Denoth SA

installaziuns sanitarias: Stecher AG

Via da Bain Crotsch:

Surtratta speciala: Rotomag AG, Sargans

Dumondas da fabrica

Il cussagl resp. la direcziun han dat ils seguaints permiss da fabrica:

- Eicher GU AG, Via da Trü: chasa cun plüssas abitaziuns
- H&V Baudienstleistungen GmbH, Via da la Staziun: sbodamaint da la chasa Caveng e surfabricaziun nouva
- Hotel Belvoir AG: sbodar la Chasa Sivü
- Arredo GmbH, Via da Rachögna: tschuffa per laina
- Hotel Filli de Gennaro AG, Chantröven: renovaziun e müdamaints Villa à Porta
- Iertavels Denoth, Stradun: renovar la fatschada e far our d'üna garascha duos abitaziuns
- Fadri + Luzia Müller-Warger, Porta: restructuraziun chasa d'abitar
- Rosinda + Antonio Campos, Via da Liuns: ingrandimaint chasa d'abitar
- Sylvia + Silvio Marchesi, Chalzina: renovaziun/ingrandimaint chasa d'abitar
- Armon Taverna, Via da Liuns: chasa d'abitar dubla cun suost per autos